

**Особые заупокойные прошения  
в день Победы в Великой Отечественной войне**

**На ектении и в молитве «Боже духов:»**

**Еще молимся о упокоении душ приснопамятных вождей и воинов за веру и Отечество на поли брани жизнь свою положивших, от ран и глада скончавшихся, в пленении и горьких работах невинно умученных и убиенных и всех Победы ради потрудившихся, и о еже проститися им всякому прегрешению вольному и невольному.**

**При возглашении вечной памяти:**

**Во блаженном успении вечный покой подаждь, Господи, усопшим рабом Твоим, приснопамятным вождем и воином за веру и Отечество на поли брани жизнь свою положившим, от ран и глада скончавшимся, в пленении и горьких работах невинно умученным и убиенным и всем Победы ради потрудившимся, и сотвори им вечную память.**

**Молебное пение  
в праздник святого равноапостольного князя Владимира —  
вспоминания Крещения Руси**

**Протодиакон:** Благослови, Владыко.

**Предстоятель:** Благословен Бог наш всегда, ныне и присно, и во веки веков.

**Лик:** Аминь.

**Протодиакон:** Слава Тебе, Боже наш, слава Тебе.

**Лик:** Царю Небесный, Утешителю, Душе истины, Иже везде сый и вся исполняй, Сокровище благих и жизни Подателю, прииди и вселися в ны, и очисти ны от всякия скверны, и спаси, Блаже, души наша.

**И возглашает протодиакон:**

**Бог** Господь и явился нам, благословен Грядый во Имя Господне.

**Стих:** Исповедайтесь Господеви, яко Благ, яко в век милость Его.

**Стих:** Обышедше, обыдоша мя, и Именем Господним противляхся им.

**Стих:** Не умру, но жив буду и повем дела Господня.

**Стих:** Камень, егоже небрегоша зиждущии, сей бысть во главу угла: от Господа бысть сей и есть дивен во очесех наших.

**Лик:** Бог Господь... **во глас 4**

**Таже тропарь Живоначальной Троице, глас 8:**

**Благословен** еси, Христе Боже наш,/ Иже премудры ловцы явлей,/ ниспослав им Духа Святаго,/ и теми уловлей вселенную,/ Человеколюбче слава Тебе.

**Тропарь Всем святым, в Земли Русстей просиявшим, глас тойже:**

**Якоже** плод красный Твоего спасительного сеяния,/ Земля Русская приносит Ти, Господи, вся святая, в той просиявша./ Тех молитвами в мире глубоце/ Церковь и страну нашу Богородицею соблюди, Многомилостиве.

**Тропарь Крещения Руси, глас тойже:**

**Благословен** еси, Христе Боже наш,/ Землю Русскую Крещением просветивый,/ людем ея низпослав Духа Святаго,/ ихже и ко спасению приведый,/ Человеколюбче, слава Тебе.

## **Тропарь равноапостольному князю Владимиру, глас 4:**

**У**подобился еси купцу ищущему добраго бисера,/ славнодержавный Владимире,/ на высоте стола сидя матери градов,/ Богоспасаемаго Киева,/ испытывая же и посылая к Царскому граду/ увести православную веру,/ обрел еси безценный бисер, Христа,/ избравшаго тя, яко втораго Павла,/ и оттрясшаго слепоту во святей купели, душевную вкупе и телесную./ Темже празднуем твое успение, людие твои суще:/ моли спастися душам нашим.

### **Запевы:**

**Пресвятая Троице, Боже наш, слава Тебе.**

**Вси святии земли нашея, молитесь Бога о нас.**

**Святый равноапостольный великий княже Владимире, моли Бога о нас.**

**Слава Отцу и Сыну и Святому Духу.**

**И ныне и присно, и во веки веков. Аминь.**

### **Таже:**

**Прокимен, глас 4: Вознесох избраннаго от людей Моих.**

**Стих: Ибо рука Моя заступит его, и мышца моя укрепит его.**

**Протодиакон: И** о сподобитися нам слышанию святаго Евангелия, Господа Бога молим.

**Лик: Господи, помилуй (трижды).**

**Протодиакон: Премудрость, прости, услышим святаго Евангелия.**

**Предстоятель: Мир всем.**

**Лик: И** духови твоему.

**Предстоятель: От** Матфея святаго Евангелия чтение.

**Лик: Слава Тебе, Господи, слава Тебе.**

**Протодиакон: Вонмем.**

**Предстоятель читет Евангелие от Матфея, зачало 55.**

**Лик: Слава Тебе Господи, слава Тебе.**

### **Запевы:**

**Пресвятая Троице, Боже наш, слава Тебе.**

**Вси святии земли нашея, молитесь Бога о нас.**

**С**вятый равноапостольный великий княже Владимире, моли Бога о нас.

**С**лава Отцу и Сыну и Святому Духу.

**И** ныне и присно, и во веки веков. Аминь.

**Посем:**

**Д**остойно есть, яко воистину, блажити Тя, Богородицу, Присноблаженную и Пренепорочную и Матерь Бога нашего, Честнейшую херувим и Славнейшую без сравнения серафим, без истления Бога Слова рождшую, сущую Богородицу Тя величаем.

**И глаголет протодиакон ектению:**

**П**омилуй нас, Боже, по велицей милости Твоей, молим Ти ся, услыши и помилуй.

**Лик: Господи, помилуй (трижды).**

**Е**ще молимся о великом господине и отце нашем Святейшем Патриархе Кирилле и о всей во Христе братии нашей.

**Лик: Господи, помилуй (трижды).**

**Б**лагодаряще со страхом и трепетом, яко раби непотребнии, Твоему благоутробию, Спасе и Владыко наш, Господи, о Твоих благодеяниях, яже излиал еси на Землю нашу от Крещения ея и до ныне, и припадаем, и славословие Тебе, яко Богу, приносим, и умиленно вопием: избави от всех бед люди Твоя и всегда, яко Милостив, исполни во благих прошения наша, прилежно молимся Тебе, услыши и помилуй.

**Лик: Господи, помилуй (трижды).**

**Е**ще молимся Тебе, Спасителю нашему, чрез благоверного князя Владимира благоволившему избрати род наш в наследие Свое и в купели Крещения даровати Духа Святаго, о еже Церковь нашу Святую от расколов и нестроений соблюсти, и в единомыслии веры ея утвердити, и миром оградити, услыши и помилуй.

**Лик: Господи, помилуй (трижды).**

**Е**ще молимся Тебе, Господи Вседержителю, о еже призрети и утвердити виноград сей, егоже насади и сохрани от всех наветов вражиих десница Твоя; и в предняя лета даруй наследию Твоему мир и безмятежие, да не умалится и не поколеблется Русь Святая, юже избрал еси в жилище Себе, да славится Трисвятое Имя Твое, услыши и помилуй.

**Лик: Господи, помилуй (трижды).**

**Давый** заповедь Твою нам, еже любити Тебе, Бога нашего, и ближняго своего, сотвори, да ненависти, вражды, обиды и прочая беззакония прекратятся, истинная же любовь да царствует в сердцах наших, молим Ти ся, Спасителю наш, услыши и милостивно помилуй.

**Лик: Господи, помилуй (трижды).**

**Предстоятель:** Услыши ны, Боже, Спасителю наш, упование всех концов земли и сущих в мори далече, и милостив, милостив буди, Владыко, о гресех наших, и помилуй ны. Милостив бо и Человеколюбец Бог еси, и Тебе славу возсылаем, Отцу и Сыну и Святому Духу, ныне и присно, и во веки веков.

**Лик: Аминь.**

**Протодиакон:** Господу помолимся.

**Лик: Господи, помилуй.**

**Предстоятель чтет молитву:**

**Триипостасный** Боже, Отче Вседержителю, Сыне Единородный, Спасителю мира, и Душе Святой, просвещающей и освящающей племена и народы! Иже и владыку Земли Русския, князя Владимира, к свету истинныя веры наставивый, и тем всю страну нашу Крещением просветивый, и сонмом святых, яко пресветлым звездам, небо Церкви нашея украсившим, возсияти даровавый! И нам, смиренным и недостойным чадом их, ныне предстоящим славе Твоей и благодарственное молебное пение приносящим в сей [тысящелетный] день Крещения Руси, великую милость даровавый, еже славити, хвалити и благодарение приносить Тебе за вся благодеяния, бывшая на Руси от лет древних и до ныне. Призри на ниву Твою, Церковь Святую, на страны и народы, преестественно восприявша веру православную из единой купели Крещения в водах днепровских и ныне приносящих Тебе, якоже прекрасный плод спасительнаго сеяния Слова Твоего, лики святых. Тии бо послужиша людям своим верою, надеждою и любовию, образом слова и жития указующе нам путь к совершенству по заповеди Христовой: будьте убо совершени, яко же и Отец ваш Небесный совершен есть. Сохраняюще сие святое наследие их, молимся Ти, Жизнодавче: спаси и помилуй нас, мир миру Твоему даруй и всему созданию Твоему, егоже по грехом нашим сыны века сего погубити тщатся. Вемы бо, яко не хочещи смерти грешников, но еже обратитися и живым им быти; призри на нас, во гресех пребывающих, отврати гнев Твой, праведно движимый на ны, даруй нам покаяние и Твоим неизреченным милосердием помилуй нас. Приими молитвы и труды наша о умножении любве среди всех людей мира сего. Землю нашу огради, власти умудри, вся утешити и умири, Церковь Твою возрасти, достояние Твое соблюди, мужи и жены, и

младенцы благодатию просвети, и вся люди Твоя в Православии и благочестии утверди молитвами Пречистой Владычицы нашея Богородицы и Приснодевы Марии, силою Честнаго и Животворящаго Креста и Всех святых, в Земли нашей просиявших, да в единении веры и любви славим Тя, Отца и Сына и Святаго Духа, во веки веков.

**Лик: Аминь.**

**Величание:**

**Величаем** ты, святой равноапостольный великий княже Владимире, и чтим святую память твою, идолы поправшаго и всю землю Русскую Святым Крещением просветившаго.

**Протодиакон: Премудрость.**

**Священник: Пресвятая Богородице, спаси нас.**

**Лик: Честнейшую херувим и славнейшую без сравнения серафим, без истления Бога Слова рождшую, сущую Богородицу Тя величаем.**

**Священник: Слава Тебе, Христе Боже, упование наше, слава Тебе.**

**Лик: Слава Отцу и Сыну и Святому Духу, и ныне и присно, и во веки веков. Аминь. Господи, помилуй (трижды). Благослови.**

**Предстоятель творит отпуст.**

**И по отпусте абие глаголет протодиакон многолетие:**

**Великому** господину и отцу нашему Кириллу, Святейшему Патриарху Московскому и всея Руси и Свято-Троицкия Сергиевы Лавры священноархимандриту, богохранимей стране нашей, властем, воинству и народам ея, всему освященному собору, благочестия ревнителем и учителем, и всем во Православии Земли нашея подвижающимся словом, писанием, учением и богоугодным житием, и всем православным христианом — многая лета.

**Лик: Многая лета (трижды).**

**Молебное пение**  
**о страждущих недугом винопития или наркомании**

**Иерей начинает:** Благословен Бог наш:

**Чтец:** Царю Небесный: **Трисвятое.** Отче наш: Господи, помилуй, **12 раз.** Слава, и ныне: Приидите, поклонимся:

**И псалом 26:**

Господь просвещение мое и Спаситель мой, кого убоюся? Господь Защититель живота моего, от кого утрашуся? Внегда приблизится на мя злобующим, еже снести плоти моя, оскорбляющий мя, и врази мои, тии изнемогоша и падоша. Аще ополчится на мя полк, не убоится сердце мое, аще встанет на мя брань, на Него аз уповаю. Едино просих от Господа, то възыщу: еже жити ми в дому Господни вся дни живота моего, зрети ми красоту Господню и посещати храм святей Его. Яко скры мя в селении Своем в день зол моих, покры мя в тайне селения Своего, на камень вознесе мя. И ныне се вознесе главу мою, на враги моя: обыдох и пожрох в селении Его жертву хваления и воскликновения, пою и воспую Господеви. Услыши, Господи, глас мой, имже възвах: помилуй мя и услыши мя. Тебе рече сердце мое: Господа възыщу. Взыска Тебе лице мое, лица Твоего, Господи, възыщу. Не отврати лица Твоего от мене и не уклонися гневом от раба Твоего: помощник мой буди, не отрини мене, и не остави мене, Боже Спасителю мой. Яко отец мой и мати моя остависта мя, Господь же восприят мя. Законоположи ми, Господи, в пути Твоем и настави мя на стезю правую враг моих ради. Не предаждь мене в души стужающих ми, яко восташа на мя свидетеле неправеднии и солга неправда себе. Верую видети благая Господня на земли живых. Потерпи Господа, мужайся и да крепится сердце твое, и потерпи Господа.

**Слава, и ныне:** Аллилуиа, аллилуиа, аллилуиа, слава Тебе, Боже. **Трижды.**

**Таже ектенія:**

**Миром** Господу помолимся.

**Лик:** Господи, помилуй.

**О** свышнем мире:

**Лик:** Господи, помилуй.

**О** мире всего мира: **И прочее.**

**О** еже призрети милостивно на рабов Своих **имярек**, страждущих душею и телом, и разрешити их от уз смертоносных страсти, Господи помилуй.

**О** еже избавити от пагубных страсти винопития (**или: наркомании**) и соблюсти спасительным страхом в чистоте, воздержании и правде души страждущих рабов Своих **имярек**, Господу помолимся.

**О** еже посетити рабов Своих **имярек** благодатию Святаго Духа, и избавити их от греха сего, в них гнездящагося, Господу помолимся.

**О** еже низпослати рабом Своим **имярек** духа премудрости и разума и всадити в сердца их страх божественный, Господу помолимся.

**О** еже подати им силу препобедити пагубную страсть и припасти к Богу в покаянии, да причастницы благ вечных будут, Господу помолимся.

**О** сродницех их и знаемых, плачущих и болезнующих, чающих Христова утешения, и о еже прияти молитвы их и воздыхания, Господу помолимся.

**О** избавитися имже и нам от всякия скорби, гнева и нужды, Господу помолимся.

**Заступи, спаси, помилуй и сохрани нас, Боже, Твоею благодатию.**

**Пресвятую, Пречистую, Преблагословенную, славную Владычицу нашу Богородицу и Приснодеву Марию со всеми святыми помянувше, сами себе и друг друга, и весь живот наш Христу Богу предадим.**

**Возглас: Я**ко милостив и человеколюбец Бог еси, и Тебе славу возсылаем, Отцу, и Сыну, и Святому Духу, ныне и присно, и во веки веков.

**Лик: А**минь.

**Таже, Бог Господь: и тропарь, глас 4:**

**Скорый в заступлении един сый, Христе,/ скорое свыше покажи посещение страждущим рабом Твоим,/ избави их от недуг и страстей,/ приведи их ко спасительному воздержанию/ и воздвигни к жизни вечней в любви к Тебе,/ во еже пети Тя и славити непрестанно, // молитвами Богородицы, едине Человеколюбче.**

**Слава и ныне, глас тойже:**

**(Тропарь иконе Божией Матере «Неупиваемая Чаша»):**

**Д**несь притецем вернии,/ к божественному и пречудному образу Пресвятыя Богоматере,/ напаяющия верных сердца/ небесною Неупиваемою Чашею Своего милосердия,/ и людем верным чудеса показующия,/ яже мы видяще и слышаще,/ духовно празднуем и тепле вопием:/ Владычице Премилостивая,/ исцели наша недуги и страсти,/ молящи Сына Твоего, Христа Бога нашего, // спасти души наша.

**Прокимен, глас 4: Та**мо бо рука Твоя наставит мя, и удержит мя десница Твоя. **Стих: Я**ко Ты создал еси утробы моя, восприял мя еси из чрева матере моя.

**Ко Ефесеем послание святаго апостола Павла чтение:**

**[глава 5, стихи 8-21]**

**Б**ратие, яко чада света ходите: Плод бо духовный есть во всякой благодости, и правде, и истине. Искушающе, что есть благоугодно Богу. И не приближайтесь к делом неплодным тьмы, паче же и

обличайте. Бываемое бо отай от них, срамно есть и глаголати. Вся же обличаемая от света, являются: все бо являемое свет есть. Сего ради глаголет: востани, спяй, и воскресни от мертвых, и осветит тя Христос. Блюдите убо, како опасно ходите, не якоже немудри, но якоже премудри: Искупующе время, яко дние лукави суть. Сего ради не бывайте несмысленни, но разумевающе, что есть воля Божия: И не упивайтесь вином, в немже есть блуд: но паче исполняйтесь духом, глаголюще себе во псалмех и пениих, и песнех духовных, воспевающе и поюще в сердцах ваших Господеви.

**Аллилуиа, глас 4: Стих: Помощь моя от Господа, сотворшаго небо и землю. Стих: Изведи из темницы душу мою.**

**Евангелие от Луки: [глава 8, стихи 26-39]**

**Во время оно прииде Иисус во страну Гадаринску, яже есть об он пол Галилеи. Изшедшу же Ему на землю, сrete Его муж некий от града, иже имяше бесы от лет многих, и в ризу не облачашеся, и во храме не живяше, но во гробех. Узрев же Иисуса, и возопив, припаде к Нему, и гласом велиим рече: что мне и Тебе, Иисусе, Сыне Бога Вышняго; молюся Ти, не мучи мене. Повеле бо духови нечистому изыти от человека: от многих бо лет восхищаше его: и вязаху его узы железны и путы, стрегуще его: и растеразая узы, гонимь бываше бесом сквозе пустыни. Вопросы его Иисус, глаголя: что ти есть имя? Он же рече: легеон: яко беси мнози внидоша вонь. И моляху Его, да не повелит им в бездну ити. Бе же ту стадо свиний много пасомо в горе: и моляху Его, да повелит им в ты внити, и повеле им. Изшедше же беси от человека, внидоша во свиния, и устремися стадо по берегу в озеро, и истопе. Видевше же пасущии бывшее, бежаша, и возвестиша во граде и в селех. Изыдоша же видети бывшее: и приидоша ко Иисусови, и обретоша человека сидяща, из негоже беси изыдоша, оболчена и смысляща, при ногу Иисусову, и убояшася. Возвестиша же им видевшии, како спасеся бесновавыйся. И моли Его весь народ страны Гадаринския отыти от них, яко страхом велиим одержими бяху. Он же влез в корабль возвратися. Моляшеся же Ему муж, из негоже изыдоша беси, дабы с Ним был. Отпусти же его Иисус, глаголя: возвратися в дом твой, и поведай, елика ти сотвори Бог. И иде по всему граду проповедаая, елика сотвори ему Иисус.**

**Таже ектения сугубая:**

**Помилуй нас, Боже:**

**Лик: Господи помилуй, трижды.**

**Еще молимся о велицем Господине:**

**Лик: Господи помилуй, трижды.**

**Еще молимся о Богохранимей стране нашей:**

**Лик:** Господи помилуй, трижды.

Не хотяй смерти грешных, но еже обратитися и живым им быти, пощади и помилуй рабов Твоих **имярек**, исцели болезни, уврачуй страсти душ и телес их, и, яко благосерд, прости им вся прегрешения вольная и невольная и скоро воздвигни их от пути погибели, молим Ти ся, услыши и помилуй.

**Лик:** Господи помилуй, трижды.

Призри, Господи, милостивно на рабы Твоя **имярек**, порабощенныя пагубною страстию, даруй им познати сладость воздержания и произрастающих от него плодов духовных, молим Ти ся, услыши и помилуй.

О еже пощадити рабов Твоих **имярек**, и простити им всякое прегрешение вольное и невольное, показати на них великую Твою милость, избавити от греховнаго пленения и насилия диавольскаго, молим Ти ся, услыши и помилуй.

О еже не умрети рабом Твоим **имярек** лютою смертию, но оживотворитися Кровию Твоею Честною и исцелитися от горести, еуже их сопровитник напои, молимся Тебе, Врачу душ и телес, услыши и милостивно помилуй.

Яко бесноватаго страны Гадаринския божественною силою от насилия диавольскаго свободивый, исцели рабов Твоих **имярек**, лоте страждущих, молим Ти ся, услыши и помилуй.

**Возглас:** Услыши ны, Боже Спасителю наш, упование всех концев земли, и сущих в мори далече, и милостив, милостив буди, Владыко, о гресех наших, и помилуй ны: милостив бо и Человеколюбец Бог еси, и Тебе славу возсылаем, Отцу, и Сыну, и Святому Духу, ныне и присно, и во веки веков.

**Лик:** Аминь.

### Молитва

Владыко Господи, сотворивый человека по образу Твоему и по подобию, и Духа Святаго тому даровавый! Избави падшее создание Твое от работы вражия, отверзи ему двери покаяния, ангела света последи ему, избавляюща от всякаго навета вражия. Услыши, Боже, припадающих к Тебе в скорби и печали и не отврати лица Твоего от одержимых пагубною страстию винопития [**или: наркомании**], но даждь им крепость, надежду, веру, произволение благое утверди и приведи их ко спасительному воздержанию, попали терние согрешений вольных и невольных, да вселится в них благодать Твоя, просвещающая и очищающая всего человека. Исцели их от тяжкаго недуга пьянства [**или наркомании**], свободи от омрачения духовнаго и окаменения сердечнаго. Даруй им здравие душевное и телесное, направи на путь трудолюбия и благочестия. Услыши, Милостивый

Господи, вопль родителей и сродников, плачущих о чадах и ближних своих. Твое бо есть еже миловати и спасати ны, Боже наш, и Тебе славу возсылаем, Отцу, и Сыну, и Святому Духу, ныне и присно, и во веки веков.

**Лик:** Аминь.

**Отпуст.**

**Христос**, истинный Бог наш, молитвами Пречистыя Своея Матери, силою Честнаго и Животворящего Креста, молитвами святого мученика Вонифатия и преподобныя Марии Египетския...

**Молитва святым благоверным Петру и Февронии для включения в богослужебные последования и прочтения по окончании Божественной литургии в дни памяти святых супругов**

**О**, велицыи угодницы Божии и предивнии чудотворцы, благовернии княже Петре и княгине Февроние, града Мурома предстатели, честнаго брака хранители и о всех нас усерднии ко Господу молитвенницы!

**Вы** во дни земнаго жития вашего образ благочестия, христианския любви и верности друг ко другу даже до гроба явили есте и тем законное и благословенное супружество прославили есте.

**Сего** ради к вам прибегаем и молимся со усердием крепким: принесите за нас, грешных, святыя молитвы ваша ко Господу Богу, и испросите нам вся благопотребная душам и телесем нашим: веру праву, надежду благу, любовь нелицемерну, благочестие непоколебимое, в добрых делех преуспеяние\*, наипаче же союзом брачным сочетавшимся даруйте молитвами вашими целомудрие, друг ко другу любовь в союзе мира, единомыслие душ и телес, ложе ненаветное, пребывание незазорное, семя долгожизненное, о чадах благодать, дома исполнены благостыни и в жизни вечней неувядаемый венец славы Небесныя.

**Ей**, чудотворцы святии! Не презрите молитв наших, со умилением вам возносимых, но будьте приснии заступницы наши пред Господем и сподобите нас предстательством вашим спасение вечное получитьи и Царствие Небесное наследовати, да славословим неизреченное человеколюбие Отца и Сына и Святаго Духа, в Троице покланяемаго Бога, во веки веков. Аминь.

***\* если молебен совершается для готовящихся вступить в брак, то молитва читается в следующей редакции:***

наипаче же хотящим союзом брачным сочетатися даруйте молитвами вашими целомудрие, друг ко другу верность и любовь в союзе мира, единомыслие душ и телес, пребывание незазорное и в жизни вечней неувядаемый венец славы Небесныя.

## Молитва о мире на Святой Земле

**Господи, Иисусе Христе, Боже наш, Крест претерпевый и смерть, спасения ради рода человеческого, во ад сошедый, тридневное погребение приемый, смерть поправый, диавола упразднивый и разрушивый вражды средостение, прими молитву смиренных раб Твоих, купно с Давидом псалмопевцем Тебе вопиющих о мире Святаго Сиона, Престола Царя Великаго, Матере Церквей, Преславнаго Иерусалима.**

**Мир даровавый роду человеческому, угаси всяку распрю и раздоры во Святей Земли, умири злобу враждующих, благослови притекающих ныне ко Гробу Твоему Живоприемному, и нас тому мысленно поклоняющихся, исходящим от сего светом Лица Твоего озари.**

**Пламенем любви распали к Тебе сердца наша, Христе Боже, да тою воспламеняеми, сердцем, мыслию же и душою, и всею крепостию нашею возлюбим Тя, и искренняго своего.**

**Яко Ты еси мир наш, и Тебе славу возсылаем, со Безначальным Твоим Отцем, и Всесвятым и Благим и Животворящим Твоим Духом, ныне и присно, и во веки веков. Аминь.**